

Ngu jo cjua xi chja
xujun changá tsëhë Nina IV

Historias del Antiguo Testamento IV

Éxodo 25 - Levítico 12



**Ngu jo cjua xi chja
xujun changá tsëhë Nina IV**

**Historias del Antiguo Testamento IV
Éxodo 25 - Levítico 12**




en el mazateco de Chiquihuitlán de Juárez

**Las ilustraciones en las páginas 2, 6, y 10 a 15 son propiedad de la Fundación David C. Cook,
usadas con permiso.**

**Primera edición
Historias del Antiguo Testamento IV
en el mazateco de Chiquihuitlán de Juárez
México, D. F. .6C
Diciembre de 1993**

Historias del Antiguo Testamento IV



Cachja Nina cojo Moisés xi tsindaja xuta tje rë Israel ngu ndihya tsjian xi cumá tsëhë Nina

(Éxodo 25:1-31:11; Levítico 24:1-9)

Hya xi quitaha Moisés ngajan rcu naxi ndetjun Sinaí ne, cachja Nina cojo rë me xi meje rë xi sahmi xuta tjë rë Israel ngu ndihya tsjian xi cumá yungun hiscan xi cjue cjuaharcun me Nina. Cuitjin cachja Nina:

—Tinoje cojo xuta tjë rë Israel ne, catjijaha me ya cojo quicha cojo tsjian ne, sehe catisahmi me ngu ndya naha cojo yějë ni xcusun xi cuma meje rë. Yějë ni xcusun vëhë ne, nihñundujun sacuaha chuva rë xi sua ri quihndë. Ndatsen rë ne, cuma cojo ya xi cjuahacoo. Xi teya ne, nihñu sacuaha can hñu metru xi teya ngu ngu ladu, hane yachan të metru xi nduju catsijo ladu ni. Ladu xi nduju jan ne, cjuañña ladu vetjucaa tsuhi cojo ladu vetje tsuhi. Hacuaha cuejña ngu cahndë xi cuma cuiseen taha ladu vetjucaa tsuhi. Jingujyë ni tahandee rë ndatsen jan ne, xtyangui tsjian tyava xi ndaja. Tsjian jan ne, cuahahñu rë ya xi hinchacun jan peru nihñu cojo sa cuma chjahaxin rë yějë ni hora xi meje cuanguen cojo.

“Ndiha tsjian xi cumá tsëhë ne, nihñu xi hñu metru teya cojo tyjuhun metru xi nduju. Hane yatë sechjan cojo sacuaha xihndë rë. Taha quixi cuiyujutaha yatë jan, sehe xinha xicjin cojo ngahñu rë yatë xi tacun nangui, hacuaha xinchacunchihin cojo ngu yanduju xi cuatju cahntsua quicha rueda xi yaja rë yatë jan. Ngatë rë ne, ñuju xcusun tsjian sanecoo xi satë. Xi setsa ngahmacjin ne, ngu tsjian ndaja xi chjuya rë cojo nachjun xcusun ngu jo ángel. Hane taha xcun tsjian vëhë ne, setsa nga ngu tsjian xi cafahya rë cojo tsja rë chu

tentsun. Xcun vëhë ne, sehe cjue nga ngu xi setsa rë xi camá cojo chuxin cachjan rë chu tsánga. Hane xcun yëjë ni ne, setsa rë cojo chuxin cachjan.

“Hacuaha taha cahntsua ndihya tsjian jan ne, xtyangui ngu tsjian xicjin tsjian xi casetsa ngahmacjin rë rcu ndihya jan sacuahachehen rë cojo sa xi cuma jo cuarto. Cuarto xi hitsë sa cjin tsëhë tingotjo ne, vëhë cahndë xi hitsë sa camanchacun. Hane cahntsua cuarto xi hitsë sa camanchacun jan ne, ngajan tejñu caxa naha xi hmi rë caxa ximinchacun. Caxa jan xi camandaja cojo yatë hane casaxtë rë cojo suva oro. Hacuaha ngajan tinchun ndyojotë xi



Esta ilustración
no está
disponible.

camahindu cjua rë tē ley xi casuá nuju. Tyjavaxcun caxa jan ne, meje rë xi suva oro cumá. Hane cuinchasun ngu ngu xcusun rë ángel jimangu ladu. Ángel jan ne, scutsejen xcun xicjin, hane tyjunga rë ne, vasantjin caxa jan satēcoo xicjin. Xi cuichjá cojo nuju ngayun xuta tjë rë Israel ne, xi cuitéxa nuju mé xi nihñu ne, ngajan tyjavaxcun caxa jan ne, ngajan cuetju cjua naha.


“Cahntsua cuarto xi tacun tiña tingotjo ne, nihñu jyan xcusun vihi xi cuiyujun ngajan: Nihñu ngu maxë hiscan xi cuiyujusun pan.



Esta ilustración
no está
disponible.


Maxë jan ne, cojo ya cumandaja sehe xcun ne, saxtë rë oro. Hacuaha nihñu ngu candeleru xi suva oro cumá. Xcusun rë

candeleru vë ne, sacuatjin jyihî ngu ya xi sua naxu rë ne, cuatjin jyihî. Hane sacuaha tsja rë ya jan ne, ngajan tjin ngojo xi xinha aceite xi cumá ndihî. Xi má jyan ne, nihñu ngu ngasuncun lihndi.



Tjehen rë ngasuncun jan ne, ngu ngu yuju rë caxa jan cuinchunsun xi tsejen sacuaha ngu ngu ndyaja ru, hane ngajan ngasuncun lihndi jan ne, cueti tyjungun sa. Hacuaha sacuaha ninda ndyaja jan ne, cumandaja cojo ya, sehe saxtë rë oro. Totje totje ni, nixtin xi chjahajenda rë ne, nahmi ne, cuitejnu me tsë tsë tyjungun sa jan xcun tejo pan sehe cuiyujusun ndaja me xcun maxë jan. Jo xindyû rë pan jan cuiyuju me xcun maxë. Pan vëhë ne, má niñu naha xi camanchacun. Nahmi ne, cumá sinë me niñu hya xi ha changá, peru suva nahmi xi cuma sinë me ta, xutaxin ne, tsajin chuva rë xi cojo me sinë me. Hacuaha satëxa rë nahmi xi sahmi me cuidadu xi yatu ndihî aceite tsëhë candeleru jan ne, nixtin nixten cueti.

“Nihñu jo xcusun xi cuiyuju ndatsen yungun tsjian jan: Nihñu ngu ngasuncun jyë, hane sacuaha cuiyujusun tsëhë ngasuncun lihndi ne, hacuaha nihñu tsëhë catsiñuju ni yuju rë ngasuncun jyë sacuaha ninda ndyaja xi cumá cojo ya. Sehe saxtë rë quicha siné. Ngajan ngasuncun jyë jan tsiquehen xuta chu xi sua me cjuatjo cojo ná. Hacuaha nihñu sehe cuejñu ngajan ngu quicha hiscan cuaneya nahmi tsja me. Hacuanitjin ne, cumá cojo suva quicha siné.



“Yějě xcusun xi cuicun vi ne, nihñu cojo sa xi hacuiin chja cuanguen cojo ngu ladu nga. Jima ngu xcusun ne, yaha rē rueda quicha hane ngajan ninguissehen ya xi chjuhun xi cjuhunhngun cuanguncujun. Hacuaha nindujun sa jingu sa xcusun xi cuma meje nuju tsēhē yungun jan; sacuaha tyuva cojo tilu xi xinha nanda. Xcusun jan ne, suva oro cumá. Hacuaha cuma meje nuju ninchin cojo tenedor xi chjunhun cojo yojo xi camatsju xcun ngasunscun xi tacun taha candatsen yungun tsjian jan. —Cuatjin cachja Nina cojo Moisés.

Hya xi camá ne, sehe cavicuya Nina Moisés hacutjin cuēhēndaja me tyjungun sa. Tyjungun sa jan ne, suva cahntsua yungun tsjian jan cueti. Tsajin chuva rē xi tu yo ni xuta sacu rē me cahndē xi cuaca me xcusun vēhē cahntsua ndava me.


Hacuaha cachja Nina cojo Moisés xi Aarón cojo xuta tjē rē me ne, hatuxa me vēhē ni xi cjuaha xa me xi má me nahmi, sahmi me xa cahntsua yungun rē Nina. Hacuaha cachja Nina hacutjin cun tsjian xi sehenndaja xi cuaja me xi má nahmi hya xi sahmi me xa cahntsua yungun.

Tsjian rē nahmi jan ne, tsjian ndaja tsējē nachjun lino cumá. Hacuaha Aarón, me xi matitjun tsēhē yējē ni nahmi ne, meje rē xi hangu xcusun jyihí xiyu rē me xi cumá rē xiyu rē nahmi xi yahnga jan. Tsjian xcun rē me ne, moradu jyihí xcusun rē. Hane tsjian xi vaja me sacuahá tsjian hasu rē me ne, yaja jo ndyojo ngu ngu ladu rcu tyja rē. Hacuaha ngajan xcun ndyojo jan ne, cumahindu ñihi rē tejo ndihya tjē rē xuta tjē rē Israel; jyun ñihi xinchataha xcun jima ngu ndyojo jan. Taha ndanisin rē tsjian hasu jan ne, quitaha ngu tsjian cuadrado hiscan casetahahñu tejo tuseti xi jemu vengui camahani chji rē. Tejo má ta ngu má tsēhē jima ngu ndihya tjē rē xuta.

Esta ilustración
no está
disponible.

Hacuaha cachja Nina cojo Moisés hacutjin cuēhēndaja me ngu aceite xi jemu ndaja jne, xi sahmi xa cojo nahmi hya xi cuetsihin

tsánga, chu tentsun, cojo chu naxin nguijña. Hane chu xi cumajin sinë me yojo rë ne, hacui chu xi cuicun vihi: chu chinga, chu coneju, cojo chu cameyu. Hisca miji rë xi satëtsja me yojo rë chu xi cuicun vë hya xi cahme chu. Xuta tjë rë Israel ne, chu chocun chja me tsëhë chu xi majin chinë vë. Chu xi hinchá ngajñi nanda ne, cuma sinë me chu peru sá xi tjin tyjunga rë hacuaha tjin tujún rë chu.



Hane jingu sa chu xi hinchá ngajñi nanda ne, cumajin sinë me chu. Hacuaha cuma sinë me tu mé ni xcusun yojo rë chu vitjén, suva yojo rë chu jya cojo yojo rë chu lote ne, cumajin sinë me. Chu nchahva ne, hacuaha cuma sinë me chu, peru yahnga chu chu langa xicjin chu nchahva ne, cumajin sinë me chu. Cumajin sinë me chu nchuchu cojo xicjin chu xi javëjne yojo rë hora xi fi. Sá xi cuisehen ngu chu xi chocun jan cahntsua ngu xcusun xi tsëhë xuta, sehe

cuyaain Moisés xi cuichja me cjua rë Nina. Hya xi camá ne, cachja xuta jan cojo Aarón xi tsindaja Aarón ngujo nina ndyojo xi machjirëhë xi cjuecojo rë me ngajan Canaán. Ngajan xi Aarón ne, cafehya rë me xuta jan xi yëjë ni me ne, cuinduvacojo me quicha tyjavañuju xi suva oro cojo sa xi cumandaja ngu nina.

Hane yëjë ni xuta ne, quiji cani me quicha tyjavañuju rë me sehe cafhatsja Aarón. Hane Aarón ne, cavundecja me quicha jan. Ha xcun xi ha camá nanda ne, sehe cavincha me cahntsua ngu hnde rë hiscan cuetju xcusun rë ngu nina ndyojo, ngu xi tsejen sacua ha ngu hndindyaja. Sehe cachja Aarón cojo xuta ta hndindyaja jan camá



cavaxë rë me tsëhë Egipto. Sehe cachja me ta cumanchujun jan ne, sahmi yëjë ni me ngu suhi tsëhë nina ndyojo jan. Cuatjin camá xi camá nchujun jan ne, casahmi xuta jan ngu suhi jyë hacuaha catsiquehen me chu xi sua me cjuatjo tsëhë nina ndyojo xi xcusun rë hndindyaja jyihi jan.

Hane tsëhë xi vëë Nina xcusun xi tisahmi xuta tjë rë Israel jan ne, cavitexa me Moisés xi cjuejne me naxi ta tsëhë xi xuta tjë rë Israel ne, hacuiin cjín nixtin caca rë cojo compromisu ta hisca ha tisahmi me condra rë ta tifaharcun me ngu nina ndyojo. Jercu camacjan camahani rë Nina cojo xuta xi cuacun jan. Hisca cachja me cojo Moisés xi tsiquehen me yëjë xuta jan, sehe cuejña me ngu compromisu cojo ndava Moisés, hane cuejñaxin xuta tjë rë Israel xi yahnga jan. Peru Moisés ne, cafehya me favor cojo Nina xi sahmi Nina cuatjin. Hisca catsinguitsjen rë me Nina compromisu xi casahmi Nina cojo Abraham, cojo Isaac, cojo Jacob. Catsinguitjen rë me Nina xi cachja suva me xi jemu cjín camahani cumá xuta tjë rë Abraham. Hacuaha cachja Moisés cojo me ta sa xi tsiquehen me yëjë xuta tjë rë Israel ne, ngajan xi xuta egipto ne, choho cuichja me. Cuichja me ta cavaxë Nina xuta xi cuacun vë tsëhë Egipto ngatsë rë

meje choho sahmi ni me cojo rë me. Hane hisca cahndë Nina cjua xi cachja Moisés ne, vëhë xi cajnehnchan xi cjan rë me, hane catsiquiin me xuta tjë rë Israel.

Ngajan xi Moisés ne, sehe canduvajne me tsëhë ndetjun jan, yahatsja me ndyojo të hiscan xi camahindu cjua tsëhë ley rë Nina.



Hane xi cafehe me ntsacu hndë rë ndetjun jan ne, ngajan cavëë me hndindyaja xi suva oro camá. Hane tijima cjuasua. Titë xuta xi sahmi jyë sahmi hnga me chu ndyaja jan. Hya xi camá ne, jemu camacjan camahani rë Moisés. Hane tsëhë xi jemu camacjan rë me ne, cavëhëtaha me nangui ndyojo të hiscan xi camahindu cjua tsëhë ley rë Nina, hane catotoho langa camaha ni. Sehe quiji me cafaha me hndindyaja xi oro camá jan, catsinguetsun me chu. Sehe jercu cacjan camahani me cojo Aarón. Ngajan xi Aarón ne, cachja me cojo Moisés xi tsijyëcacun Moisés tsëhë Aarón ngatsë rë xcusun xi camá ta, jercu cjuaxti camaha ni camá xuta, hane meje rë me ngu nina xi cjuecojo rë me. Cuatjin camá xu xi cafehya Aarón quicha tyjavañuju. Cachja Aarón xi camá cafaha me quicha cavincha me xcun ndihi, hane ngajan sacua ha ngu cjuarcun cavetjutsejen chu hndindyaja jan. Vëhë xi hacuiin cjuaquixi cachja me cojo Moisés.

Hane xi vutsejen Moisés xi xuta jan ne, cuihndiin me tsëhë Nina ne, sehe cachja me cojo xuta jan. Cachja me xi ngu ni cjuatacun cumá tsëhë Nina, cumajin xi majocacun me. Vëhë xi tu jarë me xi meje cuihndë me tsëhë Nina ne, catji me catinchacun me hiscan secun Moisés. Hya xi camá ne, yëjë xuta tjë rë Leví ne, quiji me

hiscan secun Moisés. Hya xi camá ne, ngutjen quiji me yějě jingu nduju hiscan tacun ndihya tsjian rě xuta, hane catsiquehen me sacuaaha jyan mil xuta xi tsejen xi meje cjuaharcun rě nina ndyojo jan.

Hya xi camá ne, Moisés ne, casahmi me oración rě yahnga xuta cojo Nina. Cafehya rě me Nina xi tsinchataha me xuta tjě rě Israel. Hane Nina ne, “Joho” cachja me, tsinchataha me xuta. Peru hacuaha cachja me xi ha quihndě cuisecuaain me xuta xi cuacun vë ndiya. Ngajan xi Moisés ne, cafehyataha me favor xi hacuiin tsismicacun Nina xuta jan. Hisca cajnetaha ne, cachja Nina ta cjue sa me cojo xuta jan.

Sehe cachja Nina cojo Moisés xi cuejnu me jo ndyojo tē sehe cjueniji nga me rcu ndetjun jan cojo sa xi cuya tsihindu me cjua rě ley rě Nina. Hane xi cavuya quijiniiji Moisés ndetjun jan ne, sehe catsinguitsjen nga Nina me xi xuta tjě rě Israel ne, sahmi ngujoyě xi cuisiajmii me cojo xuta xi siu ngajan Canaán hacuaha cjuuin tjenguuin me cjuachacun rě xuta jan. Hacuaha catsinguitsjen rě me tsěhě ngujo sa ley rě me. Cuatjin camá xi Moisés ne, cavejña nga

me rcu ndetjun jan yachan nixtin, catsihindu me xcun ndyojo të jan të mandamientu rë Nina. Hane xi camá hindu nga ne, sehe quijijne me tsëhë ndetjun jan. Hya xi camá cajne me ne, tsejen xi xcun me ne, jercu tu seti camaha ni camá tsëhë xi cavisiajmi me cojo Nina.



Hane cavëë xuta xcun me peru suva Moisés ne, camachayiin rë me xi cuatjin jyihi camá me. Hane Aarón cojo xuta xi yahnga jan, jemu tsacjun me xi cjue vaha me hiscan secun Moisés ta jemu jyihi xcun me. Peru hiscan xi cajnetaha ne, quiji vaha me,

sehe ngajan xi Moisés ne, cachja me cojo xuta jan yëjë xcusun xi meje rë Nina xi cumá. Cuatjin camá xi cavetsa Moisés ngu tsjian xcun me hya xi cavisiajmi me xcun xuta, peru xi fi visiajmi me cojo Nina ne, sehe cafaxin nga me tsjian jan; cuatjin casahmi me ta jemu suandya rë xuta xi vutsejen me.

Catsindaja Xuta Ndava Tsjian rë Nina

(Éxodo 35-40)

Casahmi tangun Moisés yějë xuta tjë rë Israel sehe cachja me cojo rë me xi meje rë Nina xi cumandaja yungun rë me. Hacuaha cafehya me tsëhë xuta xcusun xi cuma meje rë cojo xcusun xi meje sua me cojo sa xi cumandaja yungun jan. Catjicojo xuta yějë ni. Hacuaha xuta chjine ya o sa xuta chjine quicha o sa xuta xi má fahya me ne, jarë me xi má sahmi xcusun xi mameje xi cuma ndihya jan ne, cjue cuisecoo me sahmi me xa. Hacuaha cachja me xi me xi hmi rë Bezaleel cojo Aholiab, me xi visecoo rë me ne, me xi cuacun vë ne, cumatitjun me tsëhë xa jan. Hane yějë xuta ne, jemu chuya rë me xi cuma xa vëhë ne, cuatjin camá xi ngutjen ni cavetsihin me cafehecojo me yějë xcusun xi mameje jan. Hacuaha cachja me xi sahmi me mé xa tsëhë. Hya xi camá ne, jercu cjín camaha ni cjuatjo xi cafehe cojo me cojo sa xi cumandaja ndihya jan. Hisca cavatjutaha xcusun xi cafehe tsëhë xcusun xi mameje rë, hane cachja Moisés xi ha quihndë cjuiin sa me cojo, ta ha jemu cjín xi tjin.

Xuta xi casahmi me xa jan ne, casahmichihin me tucutjin cavitexa Nina Moisés ngajan rcu ndetjun jan. Cavëhëchjine me yatë, cafahya me tsjian, casahmi me xcusun xi tsicojoxa rë cahntsua ndihya jan, casahmi me aceite xi jemu ndaja jne, hacuaha casahmi me tyjungun sa. Yëjë xcusun xi quijicojo xuta ne, catsicojo me tsëhë xa jan, hacuaha catsicojo me tujún xi cavechji xuta xihin hya xi camaxqui me. Hane xi meje cuijnetaha xa ne, tjin cha xi cavëhëndaja cha tsjian xi cuaja nahmi. Hya xi ha camachihin yëjë ni ne, sehe quiji Moisés cafahacuenda me tsëhë xa xi camá. Hane xi cavutsejen me ne, ndatjin cavetju ta camá sacuatjin jyih hane sacuatjin chuva rë xi catsingacun Nina.

Ngajan xi Nina ne, cachja me cojo Moisés xi cavëhëcoo me ya sehe setsa rë tsjian tsëhë ndihya tsjian jan cojo sa xi sahmicichihin me ndihya. Sehe catitejnu rë me aceite xi jemu ndaja jne, hane cojo vëhë sahmi cuenda xi ndihya vëhë ne, ngu ndihya ximinchacun, hane suva ni Nina xi tsëhë me. Hane cuma junta xi cjuaha nahmi xa tsëhë ndava Nina hane catetsihin catama xa xi sahmi nahmi. Hane casahmi Moisés sacuaha cavitexa Nina. Hya xi camá ndava Nina

hane cavetsihin xa cahntsua ne, ha tjin rë ngu nu xi cavetju xuta tjë rë Israel tsëhë Egipto.

Hya xi ha camá casahmi xuta tjë rë Israel sacuatjin cavitexa Nina me ne, yufi xi quiji titjun tsëhë me hacutjin cjui me hisca xi cafehe me hiscan ndetjun Sinaí jan ne, canduvajne yufi jan hisca casetsa rë ndihya jan. Cuatjin camatsejen xi ngajan ndihya jan ne, tacun Nina. Hisca nixtin hya sa ne, yufi jan catsingacun rë xuta hya xi meje rë xi cjuenduju me ndiya cojo sa hya xi cuiyujutaha me ngu cahndë. Cuijinhnga yufi tsëhë ndihya tsjian jan hya xi meje rë xi cjuenduju nga xuta jan cojo ndiya rë me.

Cachja Nina cojo Moisés Tsëhë Hñu Xcusun Cjuatjo xi

Meje rë xi Sua Xuta Nina

(Levítico 1-7; 17; Números 5; 15:1-31; 28:1-15)

Cachja Nina cojo Moisés xi tjin hñu xcusun cjuatjo xi meje rë xi sua xuta Nina. Ngu xcusun cjuatjo xi cuacun vëhë ne, cjuatjo xi tjinchihin hmi rë. Chu xi machjirëhë tsëhë cjuatjo jan ne, chu ndyaja o sa chu tsánga o sa chu tentsun o sa chu paloma o sa chu

cucuvi. Peru tu jarë chu vëhë xi sua xuta me ne, meje rë xi ngu chu xi tsajin camaha ni me cun rë chu. Xuta xi cjuccojo me chu ne, cuisanetsja me rcu chu ne, sacuahha xi cuincha me jyë rë me xcun chu, hane sehe tsiquehen me chu. Hane xi siu nahmi ngajan ne, cuitejnu me jni rë chu xcun ngasunscun jyë, hane sacuahha yojo ru jan ne, cuaca me. Nina ne, sua me cahndë xi cueya chu jan ngatsë rë jyë rë xuta xi casua me chu jan cjuatjo cojo Nina, hane ndaja scuë Nina me.

Cjuatjo xi majo ne, sua me scua xi camá tsëhë trigu. Cjuatjo vëhë ne, sua me tsëhë cjuandaja rë me. Hatuxa tjin rë xi tjun tjun scuan rë pan cuma. Tjin cjuatjo xi tsëhë trigu jan xi secjan rë scuan rë pan jan cojo aceite, tjin nga xi secjan rë aceite sehe matsju. Cjuatjo xi cuacun vë ne, setahataha hitsë tyjungun sa cojo. Hacuaha tjin xi chjan cahntsua horno, sacuahha gayeta, o sa xcun nitja, o sa tsajin ne, cahntsua tyucu chjan. Yëjë ni cjuatjo xi má cojo scua rë trigu ne, hatuxa tjin rë xi secjan rë aceite cojo naxa. Peru secjaain rë san, secjaain rë tsjen. Hya xi ngu xuta ficani me ngu xcusun cjuatjo tsëhë trigu ne, nahmi ne, cuaca me hitsë tsëhë ngajan ngasunscun sacuahha ngu cjuatjo xi cuma rë Nina. Hacuaha cuaca me yëjë

tyjungun sa xi cjuí tangun cojo cjuatjo jan. Hya xi cumá ne, yějě cjuatjo xi cuangui jan ne, cuma sině nahmi. Peru sá xi ngu nahmi cjuecani me ngu cjuatjo xi cama cojo trigu jan ne, cjuě cueti camahani cjuatjo rě me.

Cjuatjo xi majyan ne, ngu cjuatjo xi satě rě nai rě chu xi sině me yojo rě. Cjuatjo vě ne, cuma sua me ngu toro o sa xi ngu vaca o sa xi ngu chu tsánga o sa xi ngu chu tentsun. Xuta xi ficani me cjuatjo xi cuacun vėhě ne, cuisanetsja me rcu chu sacuahá xi cuincha me jyě rě me xcun chu ne, sehe tsiquehen me chu. Hya xi cahme chu ne, nahmi xi siu ngajan ne, cuitejnu me jni rě chu xcun ngasunscun, sehe cuaxě me tu ngaxtun rě chu, hacuahá cuaxě me hitsě changascuan rě chu cojo yějě xine rě chu. Sehe cuaca me yojo xi cavaxě me ngajan xcun ngasunscun sacuahá ngu cjuatjo cojo Nina. Hane xuta xi cjuecani me cjuatjo vėhě ne, sua me nahmi ndanisin rě chu jan cojo vasentjin rě vasentjin rě ndangaxtun chu cojo yojo rě. Sehe yojo xi cuangui tsěhě chu ne, cuma tsěhě xuta nai rě xi sině me suva me cojo ndava me.

Jyan xcusun cjuatjo xi cuma sinë nai rë yojo rë . Ngu xcusun vëhë ne, hacui xcusun xi sua xuta hya xi sua me nacuechji rë Nina. Xuta xi sua me nacuechji rë Nina cojo cjuatjo vëhë ne, hacuiin suva chu sua me ta hacuaha sua me cjin xcusun gayeta, cojo pan. Ngujo pan jan ne, cumá cojo san rë, hane ngujo nga ne, hacuiin cojo san rë cumá. Hane xi sinë me yojo tsëhë cjuatjo vëhë ne, mameje rë xi ha nixtin xi catsiquehen ni me chu ne, ha hya sinë me yojo vëhë. Ngu nga cjuatjo xi cojo me sinë me ne, hacui cjuatjo xi sua xuta sacuaha parte rë me tsëhë ngu cjuatjo xi cachja me cojo Nina xi sahmi me. Hane cjuatjo xi má jyan jan ne, cjuatjo xi vetjucacun xuta, cuatjin hmi rë. Cjuatjo vëhë ne, cjuatjo xi cojo xuta tsëhë cjuandaja rë me ta cuatjin meje sahmi me. Sacuaha jo cjuatjo xi vijnetaha vë ne, sa xi camajin cajnë me yojo vëhë nixtin xi catsiquehen me chu, cuma sinë me xi cuma nchujun; peru sá xi cuatju sa nixtin ne, cumajin sinë me. Xuta xi jinë me yojo tsëhë cjuatjo ne, meje rë xi tyjahi me cojo cjuatacun rë me xcun Nina.

Nina ne, casuaain me cahndë xi sinë xuta tjë rë Israel xine o sá jni rë chu. Hacuaha casuaain me cahndë xi tsiquehen me chu rë me xi tuyjë cahndë. Xi meje rë Nina ne, xi cjuecojo xuta chu rë me

ngajan xcun nahmi hane ngajan cueya chu sacuaha cjuatjo. Cuatjin sahmi me hya xi meje sinë me yojo o sá xi tsiquehen me ngu chu vitjen xi sinë me chu ne, meje rë xi scandi me jni rë chu nangui sehe cuitejnu rë me nihndë.


Hane ngu nga xcusun cjuatjo xi sua me ne, hacui cjuatjo tsëhë jyë rë me. Cjuatjo vëhë ne, cjuahatsja Nina tsëhë ngu xuta xi casahmi me ngu cjuatsehen. Sá xi ngu nahmi sahmi me ngu cjuatsehen ne, tjin rë me xi cjuecani me ngu ndyaja ndava Nina tsjian jan, sehe cuisanetsja me rcu chu sacuaha xi cuincha me jyë rë me xcun chu, sehe tsiquehen me chu. Sehe cjuaya me jni rë chu

Esta ilustración
no está
disponible.

cjuecojo me cahntsua ndava tsjian
rë Nina, hane tsufë me tsë tsë jni
catsiñuju yuju rë xi sacuaha ninda
ndyaja tsejen xi siu yuju rë
ngasunscun lihndi hiscan xi ti

tyjungunsa. Hacuaha tsufë me tsë tsë tsjian xi vechja rë xi seyachehen cuarto rë cahndë ximinchacun, o sá cahndë hiscan tacun caxa rë ximinchacun cojo cuarto xi tacun tingotjo jan. Hane jni xi cuangui jan ne, cjue cojo me ndatsen yungun hane tsingaqui me

ntsacu ngasunscun jyë. Cjuë ne, sehe cuaca me tu ngaxtun chu, cojo hitsë changa rë chu, cojo xine rë chu xcun ngasunscun jyë vë, sehe cjuaha me yëjë yojo rë chu jan ne, cjue me cojo ngajan xin tsëhë ndihya tsjian jan ne, hane ngajan cjuë cuaca me.



Sa xi yëjë xuta tjë rë Israel sähmi me ngu cjuatsehen ne, xuta changá tsëhë me ne, cjuecani me ngu ndyaja ndava Nina. Hane xi cjuehe me ngajan ne, sehe cuisanetsja me rcu chu sacuaha xi cuincha me jyë rë me xcun chu, sehe tsiquehen me chu. Hacuanitjin ni sahmi ngu nahmi sá xi jingu sa nahmi sahmi me ngu xcusun xi ndajintjin.

Sá xi ngu xuta matitjun sahmi me ngu xcusun xi ndajintjin ne, ngu tentsun cjuecani me chu. Sá hacuiin xuta matitjun má me xi casahmi me ngu xcusun xi ndajintjin ne, ngu chu tsánga naa

cjuecani me. Sá xi tsajin rë me chu tsánga naa o sá chu tentsun naa ne, cuma cjuecani me jo chu paloma o sa jo chu tucjin. Tsëhë jo chu jan ne, ngu chu sua me chu cjuatjo tsëhë jyë rë me, hane ngu nga chu ne, sua me sacuaha ngu cjuatjo xi tjinchihin. Sá xi hisca tsajin rë me paloma o tucjin ne, cuma cjuecani me handasa scuan rë trigu, peru scuan jan ne, hacuiin aceite hacuiin tyjungun sa cuincha me tsëhë. Hya xi cuatjin sua xuta jyë cjuatjo rë me ne, hane cjuehya me Nina cjuaninchataha ne, tsëhë jyë rë me ne, cuetsa Nina jyë rë me. Hane sacuaha yojo rë cjuatjo jan ne, sá xi cahntsua ndava Nina jan caxtejñii jni rë chu ne, yojo rë chu ne, cjuë cuetji. Peru sá xi caxtejnuu jni ne, nahmi ne, cuma sinë me yojo vë.

Ngu xcusun nga cjuatjo xi cjue xcun Nina ne, hacui cjuatjo tsëhë xuta xi tjin xi cun rë me peru hacuiin tujyë casahmi me, ta hisca camachayiin rë me. Cavangui me xi cun rë me, hane meje rë xi sua me ngu chu tsánga sacuaha cjuatjo cojo Nina tsëhë jyë vëhë. Hacuaha cachja Nina tsëhë ngu nga xuta xi hisca ñihi rë Nina caveyanangui me xi cachja me cjuandesu cojo jingu sa xuta cojo sa xi cuma cjuaha me tu mé ni xcusun xi yaha xuta jan. Meje rë xi xuta jan ne, tsiquehen me ngu chu tsánga xi sua me sacuaha cjuatjo

cojo Nina tsëhë jyë vëhë, tsëhë xi hisca ñihi rë Nina caveyanangui me cojo sa xi cumacjain rë xuta jan cjuandesu xi cachja me. Sacuaha yëjë ni cjuatjo xi tsëhë ngu jyë jan ne, hya xi quijicani xuta chu tsánga sehe catsiquehen me chu ne, nahmi ne, tjin rë me xi cuitejnu me jni rë chu xcun ngasunscun jyë, hacuaha ngajan cuaca me tungaxtun rë chu cojo hitsë changa scuan rë chu cojo xine rë chu. Hya xi camá ne, yojo xi cavangui jan ne, satë rë nahmi xi sinë me. Hane xuta xi cun rë jan ne, tsicuya me xcusun xi cafaataha me tsëhë xuta, hisca quisuncoo ngu cahndë tsëhë hñu cahndë tsëhë chji rë xcusun xi cafaa me sehe sua me nai rë.

Tjin cjuatjo xi nchunchujun ni meje rë xi sua xuta tjë rë Israel. Nchunchujun ni tsiquehen nahmi jo chu tsánga xi ngu nu tjin rë chu, xi cumá chu cjuatjo xi sua xuta cojo Nina. Ngu chu jan tsiquehen me nguitajñu, hane ngu chu jan tsiquehen me hora xi cuetje tsuhi. Hacuaha jo ndiya xi ngu nixtin jan ne, sua me vinu. Cuatjin sahmi me nchunchujun ni. Hane sacuaha nixtin xi chjahajenda rë ne, ñuju chu tsiquehen me. Jo chu tsiquehen me nguitajñu, hane jo chu tsiquehen me hora xi cuetje tsuhi. Hacuaha hacjahi sahmi me nixtin tjun tsëhë jima ngu sa ta xi cjuë jyë rë xuta ne, tsiquehen nahmi ngu

chu tentsun. Hacuaha nixtin tjun jan ne, tsēhē ngu cjuatjo xi
tjinchihin ne, tsiquehen nahmi jo hndindyaja cojo ngu chu tsánga jyē
cojo yatu chu tsánga langa.

Visehen Nahmi Xa xi Cafahatsja me

(Levítico 8-9)

Jinguyējē rē xi casetaha Moisés ngajan ndetjún Sinaí jan ne,
cachja Nina cojo rē me tsēhē suhi xi cumá cojo sa xi cjuahatsja
nahmi xa. Cuatjin camá xi casahmitangun Moisés yējē xuta ngajan
ndatsen yungun rē Nina jan. Sehe cavane Moisés ntsacu Aarón cojo
ntsacu quihndi rē Aarón. Sehe catsicaja me Aarón tsjian xi hatuxa
tsjian tsēhē nahmi xi matitjun, hane sacuaha quihndi rē Aarón ne,
catsicaja me tsjian rē nahmi. Hya xi cama ne, sehe cavitejnu Moisés
aceite xi jemu ndaja jne xcun ndava Nina cojo yējē xcusun xi
sahmixa cahntsua yungun jan. Hacuaha cavitejnu me nahmi xatsē
jan. Cuatjin casahmi Moisés sacuaha cavitexa Nina.

Hya xi camanchacun Aarón cojo quihndi rē me; (ta quihndi rē
me ne, má sacuaha nahmi xi visecoo rē me) cavisanetsja me rcu ngu

chu ndyaja sehe catsiquehen Moisés chu sacuaha cjuatjo xi sua nahmi jan cojo Nina tsëhë jyë rë me. Cavaca me yëjë xine rë chu xcun ngasuncun jyë hane sacuaha yojo xi cavangui rë chu jan ne, quijicojo Moisés cavaca me xin tsëhë ndatsen ndihya tsjian jan ta cjuatjo jan ne, tsëhë ngu nahmi camá.

Hya xi camá ne, sehe catsiquehen Moisés jo chu tsánga. Ngu chu cahme chu sacuaha tsëhë ngu cjuatjo xi tjinchihin, hane ngu chu cahme chu sacuaha tsëhë suhi xi tijima. Hacuaha catsufë me tsë tsë jni rë chu tsánga xi majo jan ladu quixi cojo ntsacu tyjavañuju cojo rcu tsja, cojo rcu ntsacu jyë rë jima ngu nahmi jan. Hane jni xi cavangui rë ne, cavitejnu me ntsacu ngasuncun jyë. Sehe cafaha me tu ngaxtun chu, cafaha me hitsë changa rë chu, cojo yëjë xine rë chu, cojo hitsë ndangaxtun chu ladu quixi. Hacuaha cafaha me niñu xi tsajin san rë. Sehe casua Moisés xi cafahatsja Aarón cojo quihndi rë me xi cuesuntsja me yëjë xcusun vëhë, hane sua me cojo Nina sacuaha cjuatjo. Cafë ne, sehe cavaca nahmi jan yëjë xcusun vëhë. Hacuaha casua me ndanisin rë chu tsánga jan sacuaha cjuatjo cojo Nina. Hya xi camá ne, Aarón cojo quihndi rë me jan ne, catsitsju

me yějě yojo xi cavangui tsěhě yojo rě chu tsánga xi majo jan, sehe cajiñě me cojo niñu jan. Suhi vėhě ne, quijicani rě ngu totje.

Hya xi cafě totje rě suhi jan ne, casua Aarón cjuatjo cojo Nina ngatsě rě jyě rě suva me cojo jemu cjín xcusun cjuatjo xi tjinchihin casua me xi tsěhě suva me. Hacuaha casua sa me cjuatjo ngatsě rě jyě rě xuta. Casua me cjuatjo rě trigu, hacuaha casua me cjuatjo xi sua me nacuechji rě Nina xi cuma sině me tsěhě. Yějě xuta tjě rě Israel ne, casahmichihin me yějě ni xcusun sacuatjin cavitexa Nina me. Vėhě xi sacuaha ngu seña xi chuya rě Nina tsěhě me ne, catsingatju Nina ndihi tsěhě yufi, hane ngu tangun ni cavaca rě yějě cjuatjo xi casua xuta jan. Hane hya xi cavěě xuta cjuarcun xi casahmi Nina ne, camachaya rě me xi Nina ne, hatuxa tjin jain rě me ngahñu.

Ley xi satě rě yějě nahmi xi cuihndě me tsěhě

(Levítico 21-22)

Nahmi ne, ngatsě rě xi xa rě Nina sahmi me ne, vėhě xi hitsě sa tjin rě me cuidadu hitsě sa cjín má ley xi faharcun me xi cumá rě

xuta xi yahnga sa. Nahmi ne, sacuiin cahndë xi cojo me cjue me xi cuinchaniji me nima. Nima xi cuma cjue cuinchaniji me ne, hacui vihi: nima nahmi rë me, cojo nima naa rë me, cojo nima quihndi rë me, cojo nima hntsë me o nima tichja me sá xi chaja sa camá cjuavixan rë nima. Hacuiin tujyë ni cjue me ta hya xi satëtsja me ngu nima ne, má chocun yojo rë me xcun Nina, hane cumajin sahmi me xa hora vëhë sacuaha nahmi hisca xi cumatyjahi nga me.

Hacuaha tjin ngu ley xi chja xi sacu cahndë xi cuixan me cojo ngu na nixti o sa xi cuixan me cojo ngu na cahan. Sacuaha nahmi xi matitjun ne, satë rë me xi cuihndë me tsëhë ley xi hitsë sa chja. Me vëhë ne, sacuiin camahani rë me cahndë xi cuisecoo me xi cuinchaniji hisca ngu xuta rë me. Hisca nima nahmi rë me o nima naa rë me, sacuiin cahndë xi cuisecoo me xi cjue cuinchaniji.

Hacuaha sacuiin cahndë xi cuixan me cojo ngu chjuun cahan.

Hacuaha sacuaha yojo rë ngu me xi sahmi me xa sacuaha nahmi ne, tsajin mé jyih, tsajin nindu, hacuiin rca me, hacuiin yoho me.

Hacuaha cachja Nina xi suva nahmi cojo xuta ndava me xi tyjahi me cojo cjuatacun rë me xcun Nina cuma sinë me comida xi satë rë me sacuaha nahmi tsëhë cjuatjo xi cjuecani xuta tjë rë Israel

cojo Nina. Hacuanitjin tjin ley tsëhë chu xi cuma cjuatjo ta cachja
Nina xi cjuahatsjaain nahmi chu sá xi tjin mé jyih yoyo ru ta chu
vëhë ne, cumachjiriin chu xi cumá cjuatjo xi sua xuta cojo Nina.

**Jo quihndi rë Aarón ne, cahndiin cjua xi cavitexa Nina
tsëhë xa rë nahmi xi sahmi me, hane cahme me**

(Levítico 10:1-7)

Jo quihndi tjun rë Aarón ne, Nadab cojo Abiu hmi rë me. Ngu
ndiya jan ne, caviyijin me xi cuacun jan xa xi sahmi me cahntsua
yungun tsjian. Hya xi camá ne, hora xi cavaca me tyjungun sa tsëhë
ngu cjuatjo ne, hacuiin ngu chihin ni casahmi me sacuahatjin
cavitexa Nina me. Hya xi camá ne, cachuyiin rë Nina tsëhë cjuatjo
vëhë ta hacuiin tucutjin sacuatjin casatë xa rë nahmi ne, hacuiin
cuatjin casahmi me. Vëhë xi Nina ne, catsingatju me ndihi xi
cavaca rë nahmi jan, catsiquehen rë me cahntsua ndava Nina jan.
Ngajan xi Moisés ne, cuitjin cachja me:

—Quixi jain xi Nina ne, hatuxa meje rë me xi cuma jain xa
sacuatjin cavitexa me.

Hya xi camá ne, catsingatju Moisés xuta xicjin Aáron xi quiiji chjaha rē cha nima quihndi tjun rē Aarón jan, sehe cjue cuaxē cha nima tsēhē cahntsua yungun tsjian jan. Peru sacuahá Aarón cojo quihndi rē me xi hmi rē Eleasar cojo quihndi rē me xi hmi rē Itamar ne, casacuiin rē me cahndē xi cuetju me tsēhē ndava Nina xi cjue scutsejen me cjuachoho xi cavatju xicjin me ta tsēhē xi sehe cavatju nixtin xi caxtejnu rē me aceite xi jemu ndaja jne cojo sa xi cuisehen me xa rē Nina ndava me. Hane jyan me xi cuacun jan ne, cahndē me cjua xi cachja Moisés, hane caviyuju me ndava Nina hora xi quiiji nima.

Cachja Nina Cojo Xuta Tjë rē Israel mé Xcusun Yojo

Cuma cojo mé Xcusun Yojo Cumajin Sinē me

(Levítico 11)


Nina ne, cachja me cojo Moisés cojo Aarón xi cuicuya me xuta tjë rē Israel xi tjin chu xi cuma sinē me yojo rē, peru hacuahá tjin chu xi cumajin sinē me yojo rē. Chu xi cuiyuju nangui quixi xi cuma sinē me chu ne, hacui chu xi cuicun vi: tu mé ni chu xi tsinguixihi chu xi jinē chu, hacuahá chacjaya yungun rē chu; chu

sahmi me xa rë me ngajan cahntsua yungun jan. Hisca ngu xuta ne, tsajin rë me chuva rë xi sahmixa me cojo aceite vëhë cahntsua ndava me. Hacuaha cachja Nina cojo Moisés hacutjin meje rë xi cuma hora xi cjuahatsja Aarón cojo quihndi rë me xa rë nahmi.

Hacuaha cachja Nina cojo Moisés jarë cha chjine ya cojo jarë cha chjine quicha xi cjuahaxa cha xi tsindaja yëjë xcusun vëhë. Bezaleel cjuaha me xa vëhë xi cuitexa me, hane cha Aholiab ne, cha vëhë cha xi majo tsëhë xa.

**Cahndiin xuta tjë rë Israel tsëhë Nina ta catsindaja me
ngu nina ndyojo
(Éxodo 31:18-34:35)**

Yachan nixtin cavejña cahndë Moisés hiscan ndetjun Sinái, hane cahntsua nixtin vëhë ne, Nina cavicuya me yëjë ni me xcusun rë compromisu xi meje rë xi sahmi xuta tjë rë Israel. Peru xuta ne, siuya me ntsacu hndë rë ndetjun jan ne, hane viin me mé xi tijima. Vëhë xi ha quihndë tsajin rë me cjuasua xi viyujuya sa me. Jemu cjín nixtin siuya me Moisés hane, xi má rë xuta ne, ha quihndë



ngajan cueya chu, hacuaha cojo xcusun hiscan cahme chu ne, cama chocun. Sá xi ngu xcusun xi tsicojoxa me camá chocun cuatjin ne, sacuaha sá xi ngu tyucu quicha ne, cuma cuane me titjun sehe tsicojoxa me, peru sacuaha ngu xcusun xi tsēhē nihndē ne, meje rē xi catacjan me ta majin matyjahi.

**Nina ne, casua me cjua hacutjin cuma tyjahi ngu xuta
xi cama chocun me tsëhë xcusun xi catsicojo me o tsëhë**


xcusun xi casahmi me

(Levítico 12-15; Números 19)

Tjin xcusun xi sahmi ngu xuta hane cuma chocun yojo rë me, hacuaha tjin chíhin xi cuatju me hane cuma chocun yojo rë me xcun Nina. Ngu xuta xi chojyihí yojo rë me xcun Nina ne, meje rë xi cuetjuxin me ngajan xin camahani tsëhë cahndë hisca caviyuju ndihya tsjian rë xuta. Hacuaha cumajin cumatiña me tsëhë jingu sa xuta, hacuaha sacuiin rë me cahndë cjue me ndava Nina. Hisca ngu xuta xi satëtaha me xuta xi cuacun vë ne, ha cojo me cavetsun yojo rë me, camá chocun me. Cojo sa xi cuma tyjahi nga yojo rë xuta xi cuacun vë xcun Nina ne, meje rë xi titjun cjue cuinduya me, hacuaha cuane me tsjian rë me. Tjin mé tsëhë xi hacuaha meje rë xi cjuecani me cjuatjo rë me xcun Nina o xi meje rë xi sahmi nahmi, xcusun xi sahmi me cojo sa xi cuma tyjahi yojo rë xuta.

Nina ne, cachja me cojo Moisés xi cuicuya me xuta tjë rë Israel xcusun rë cjuatjo xi cjuecani ngu chjuun cojo sa xi cumatyjahi nga

na xcun Nina hya xi catsin rē na ngu quihndi. Sá xi ngu quihndi xihin ne, yachan nixtin má chocun yojo rē na. Hane suva quihndi jan ne, meje rē xi xti chuxin rē hya xi cuechutaha quihndi jyin nixtin. Sehe xi cuechutaha yachan nixtin xi catsin rē na quihndi ne, cjuecani na ngu chu tsánga sacuahá ngu cjuatjo xi tjinchihin, hacuahá cjuecani na ngu paloma o sa ngu chu cucu sacuahá cjuatjo



tsēhē jyē rē na. Hane nahmi xi siuxa ngajan ne, sua me cjuatjo vēhē xcun Nina. Sehe ngajan xi chjuun vēhē ne, cuma tyjahi nga yojo rē na xcun Nina. Peru sá xi jemu yuma camaha ni na hisca

cumajin cjuecani na ngu chu tsánga ne, cahndē rē vēhē ne, cuma cjuecani na jo chu paloma o sa xi jo chu cucu. Sa xi chjuun má quihndi xi catsin rē na ne, cuejñaya na hisca xi cjuē xi ñujuchan nixtin ne, sehe cuma cjuecani na chu tsja nahmi xi sua me cjuatjo cojo Nina, hane cuma tyjahi nga yojo rē na.

Sehe cachja Nina cojo Moisés cojo Aarón tsēhē mé xi ndatjin sahmi me hya xi ngu xuta yaha rē ngu chíhin xcun chuxin rē me.

Titjun scutsejen nahmi sacuaha xi cuitexa Nina cojo sa xi hvë me sá xi vitaha chíhin o sá hacuiin cjan rë. Sá xi cjan rë chíhin ne, nahmi ne, tsinguixi me xi xuta vëhë ne, chojyihí yojo rë me xcun Nina, hane xuta vëhë ne, meje rë xi cjue cuejña me ngu xín camaha ni tsëhë cahndë hiscan siu ndihya tsjian rë xuta, hacuaha cumajin cjue sahmi tiña xuta tsëhë me. Sehe sá xi tsejen tsëhë chíhin vëhë xi camandaja ne, cjue tjengui nahmi xuta hmu rë, hane cuichja nahmi sá xi quixi xi camandaja me. Sehe sá xi chja nahmi xi camandaja me, ngajan hiscan xin ne, sahmi nahmi xcusun rë me xi cumá tyjahi xuta vëhë xcun Nina. Cuitjin sahmi me: Cjuaha me jo nisë, sehe tsiquehen me ngu chu jan xcun ngu tasa jyë xi híncha nandá. Sehe cuinchutaha me xuta xi camandaja jan jni rë chu nisë jan yatu ndiya. Sehe cjuaha me nisë xi majo ne, tsinguisehen quicun ni me chu jan ngajñi rë jni rë chu xingu hane sehe tsismi me chu xi majo xi cuma cjue chu. Hya xi camá ne, xuta xi cama ndaja jan ne, meje rë xi cuane me tsjian rë me, hacuaha cuejnu me yëjë tsjarcu me, hane xi cjuë sejnu rë rcu me ne, sehe cuinduya me.

Hane xi cjuë jyun nixtin ne, meje rë xi cuya sahmi me jyan xcusun vëhë ngu ndiya nga. Hane xi cumá nchujun jan ne, meje rë

xi cjue me ndava Nina ne, cjuecani me jo chu tsánga xihin cojo ngu chu tsánga chjuun, o sá xi yuma me ne, cuma cjuecani me ngu ni chu tsánga xihin cojo jo chu paloma o jo chu cucu. Cojo chu xi cjue me cojo ne, hacuaha cjuecani me ngu cjuatjo tséhë scuan rë trigu cojo hitsë aceite. Chu xi cjuecani me ne, cumá chu sacuaha cjuatjo tséhë jyë xi casahmi me cojo cjuatjo xi tjinchihin. Hya xi tisua me cjuatjo cojo Nina ne, sahmi nahmi ngu nga xcusun xi hatuxa tséhë xuta xi camandaja me tséhë chíhin vëhë. Tsufë me hitsë jni rë chu xi cahme sacuaha cjuatjo tséhë jyë jan ntsacu tyjavañuju quixi xuta jan, cojo rcu tsja quixi jyë me, cojo rcu ntsacu jyë me ladu quixi. Hane sehe tsufë me hitsë aceite jan ngasunscun jyë, sehe cuya tsufë nga me hitsë catsijyan cahndë tséhë yojo rë xuta jan. Hane xi cuatjin sahmi me ne, xuta jan ne, cumatyjahi nga yojo rë me xcun Nina.

Hya xi ngu xihin quitaha ngu nindu yojo rë me hacuaha hinchá titsë rë ne, cama chojyihí yojo rë me xcun Nina. Hacuaha tu mé ni xcusun xi tsicojoxa me ne, cama chojyihí xcun Nina. Hisca tu yo ni xuta xi tsicojo me xcusun xi catsicojo me xi quitaha rë nindu jan ne, hacuaha cuma chojyihí yojo rë me; peru ngu ni nixtin vëhë. Sehe

hacuaha cojo me meje rē xi cuane me tsjian rē me, hacuaha cuinduya me. Hane hya xi cuetje tsuhi ne, sehe cumatyjahi nga yojo rē me xcun Nina. (Hora vėhė cumatyjahi me ta tsėhė xi sacuaha xcusun rē xuta tję rē Israel ne, hora xi cuetje tsuhi ne, hora vėhė vetsihin nixtin xi tsėhė me.) Hya xi cumandaja nindu xi quitaha yojo rē xihin jan ne, meje rē xi cjuecojo me jo chu paloma o sá xi jo chu cucu xcun nahmi xi sua me ngu chu sacuaha cjuatjo cojo Nina tsėhė jyė rē me, hane sua me ngu chu sacuaha ngu cjuatjo xi tjinchihin. Hane xi casua me cjuatjo vėhė ne, camatyjahi nga yojo rē me xcun Nina.

Jima ngu ndiya xi cjuaña xihin cojo ngu chjuun ne, meje rē xi cuinduya me ta, camachocun yojo rē me xcun Nina, hane hisca xi cuetje tsuhi ne, sehe cumatyjahi nga. Yachjin ne, hacuaha má chocun yojo rē na xcun Nina hya xi má hmu rē na chíhin chuva sa rē na. Hya xi camachocun yojo rē xuta ne, miji rē Nina xi cjue me yungun tsjian.

Hya xi ngu xuta satėtsja me ngu nima, o sa xi visehen me ndava nima ne, hacuaha machocun yojo rē me xcun Nina. Hane xi

machocun yojo rë me tsëhë ngu nima ne, ficani rë hisca ngu totje.
 Nixti jyan cojo nixti yatu tsëhë totje jan ne, ngu xuta xi tyjahi yojo
 rë me xcun Nina ne, cuitejnu me tsë tsë nanda yojo rë xuta xi cuacun
 jan. Nanda xi cuitejnu me jan ne, casecjan rë cojo ndesu rë ngu chu
 ndyaja hani xi suva ndesu sa rë chu camá xi cati camaha ni chu.
 Hane xi cavatju yatu nixtin jan ne, xuta xi camá chocun jan ne,
 cuinduya me hacuaha cjuengui tsjian rë me, sehe hya xi cuetje tsuhi
 ne, sehe cumatyjahi nga yojo rë me xi cuma cjue me xcun Nina.

Ngu Jo Sa Ley xi Casua Nina xi Meje rë me xi Cuiyujutaharcu Xuta Tjë rë Israel

(Levítico 18-20)

Nina ne, jemu cjín sa ley xi casua me Moisés xi meje rë me xi
 cuiyujutaharcu xuta tjë rë Israel. Cachja Nina cojo xuta tjë rë Israel
 ta sa xi cuiyujutaharcu me cjua rë yëjë ley vëhë ne, cuejña Nina cojo
 rë me yëjë nu yëjë nixtin. Ngu ley ne, chja ta miji rë xi sahmi me
 cjuatsehen cojo ngu chjuun o sa cojo ngu xihin xi xicjin ndaja me.
 Hane ngu nga ley ne, chja ta miji rë xi sahmi me cjuatsehen ngajñi
 xihin me o sa ngajñi chjuun me. Hacuaha miji rë xi sahmi me

cjuatsehen xuta cojo ngu chu. Hacuaha cachja me xi ngu xihin ne, miji rë xi cjuañä cha cojo ngu chjuun nixti xi hmu rë na tsëhë chíhin chuva sa rë na. Cachja Nina cojo rë me xi yëjë xuta xi siu ladu rë Canaán jan ne, sahmi me yëjë xcusun tsehen xi cuacun vë. Hane ngatsë rë cjuatsehen xi sahmi me ne, cjuahataha Nina yëjë nangui rë me, sehe sua rë me nangui jan xuta tjë rë Israel. Nina ne, meje rë me xi cuetaharcu xuta yëjë ley xi casua Nina me cojo sa xi sahmi me me castigu.

Nina ne, cachja me cojo xuta tjë rë Israel xi cama cavaxijin me me xi cuma ngu xuta tyjahi xcun Nina, cuma me ngu xuta xi cuiyujutaha rcu me ley xi casua Nina ta Nina ne, hatuxa tyjahi me. Hacuaha catsinguitsjen Nina me xi meje rë xi cjuaharcun me xutacha rë me, hacuaha meje rë xi cjuahajenda me nixtin xi chjahajenda rë, hacuaha tsajin cahndë xi tsindaja me hisca ngu nina ndyoyo; hacuaha tsichiin me mé tsëhë xuta hacuaha cuindachaa in me xuta, hacuaha xi cuichja me ngu cjua ne, cueyananguiin me ñihi rë Nina hya xi sahmiichiin me cjua vëhë. Hacuaha cachja me xi hya xi cuijnetaha xa tsëhë jima ngu nixtin ne, cuechji me mosu rë me tsëhë xa xi casahmi me nixtin jan. Sacuaha xuta loho, xuta rca, xuta

yuma, cojo xuta ngu nangui ne, catitsihmucacun me xuta jan. Miji camaha ni rē xi choho scuēē xicjin me ngajñi rē me xi xuta tjē rē Israel me, hacuaha miji rē xi sahmingojo me cojo xuta xi choho sahmi me cojo. Meje rē xi ndaja sahmi me cojo xuta sacuatjin ndaja sahmi me cojo suva me. Cumajin cjue sahmi me cjuachjinenguise cojo xuta xi ma visiajmi me cojo hasen rē nima. Hya xi cuiteña me o sá xi cuatsē me, meje rē xi ndaja chuva sahmixa me cojo. Hane sá xi ngu xuta tsiquehen me quihndi rē me xi sua me quihndi jan sacuaha cjuatjo cojo ngu nina ndacha ne, hacuaha meje rē xi tsiquehen me xuta jan. Sehe catsinguitsjen Nina xuta xi meje rē xi cuetaharcu me ley xi casua Nina me, hane xi sahmicihin me ley jan ne, cuma cuiyujucahndē me hya xi cuisehen me ngajan nangui Canaán.

